



Nº 11. Especial branu 2006.

Cartafueyu de Moceda d'Izquierda Asturiana.

na cai

organización >>

mias>> nel Derrameidea

Un grupu de militantes de Moceda d'Izquierda Asturiana tuvo en Pravia la **primer fin de selmana de xunetu** trabayando nel espardimientu de material reivindicativu durante'l Derrame Rock, dientro del **Derrameidea**, un espaciu que la organización acuta pal **intercambéu d'idees y proyectos** ente la xente más activu y sensibilizao políticamente del nuesu país col públicu que cada añu asiste masivamente a estes xornaes musicales, referente yá nel nuesu país.



Aprovechando la ocasión, **mias>> estrenó material** nuevo y continuó esparciendo los yá perconocíos na cai>> y Qué ye mias>>?, xunto a otres **chapes, panfletos, pegatines y cartafueyos** que se reeditaron per enésima vegada.

Mui bien de **xente averóse al nuesu puestu** interesao pol material y por alquirir tola información sobre la nuesa organización. Tanto'l tratu col públicu como con otres asociaciones y la organización foron dafechu satisfactorios nun **ambiente festivu y cultural de lo más prestoso**. Habiendo oportunidá, repetiremos.

I Asamblea Nacional

El sábadu 29 de xunetu celebróse n'Uviéu la I Asamblea Xeneral de Moceda d'Izquierda Asturiana depués d'un **cursu políticu d'alta actividá que la propia organización -mias>>- considera fundacional** dao que se vivieron una riestra de cambeos de calter

cualitativu y cuantitativu que provocaron la creación de **mias>>** como organismu estremáu alministrativamente d'IAS anque venceyáu a ésti dafechu ideolóxicu y estratéxicamente. Tamién hebo espaciu pa les **propuestes preelectorales** de moceda.

Otramiente, quedó configurada la **Dirección Nacional**, que cuenta con un portavoz nacional y dos redes, una técnica y otra política. El portavoz nacional ye **Carlos Suari Rodrigue**, de 23 años, escritor y estudiante de Ciencies de l'Actividá Física y del Deporte y d'Antropoloxía Social y Cultural.

Na rede técnica alcontramos como Secretariu de Comunicación y Nueves Tecnoloxíes a **Xuacu Rodríguez Morón**, de 22 años y cocineru y estudiante de Ciencies Polítiques, como Secretaria de Finances a **Almudena Suárez Flórez**, de 16 años y estudiante de Bachilleratu, como Secretariu d'Organización y Rellaciones a **Iyán González Castro**, de 21 años y estudiante de Xeoloxía.



Na rede política ta como Secretaria d'Igualdá y Xusticia Social, **Clara Díez Márquez**, de 17 años y estudiante de Bachilleratu, como Secretariu de Desendolcu Socioeconómicu a **Carlos Fernández Fuente**, de 27 años, llicenciáu n'Económiques y trabayador nuna aseguradora, como Secretaria d'Ecología a **Paula Fernández Montes**, de 20 años y estudiante de Filoloxía Inglesa y como Secretariu d'Enseñu y Cultura a **Xandru Blanco Huergo**, de 19 años y estudiante de Filoloxía Clásica.

Eita preséntase al mundu na web

¡Hola! Llámome **Eita Llera**, tengo 17 años y soi militante de **Mocedá d'Izquierda Asturiana**. Dende agora vas poder ver la mio **tira gráfica** na páxina web de la organización. Amás de cuntar con un requexu na web de **mias>>**, el mio propiu blog va echar a andar dientro de mui poco. Procuraré nestes canales dir cuntando la parte de mio vida más averada a la **militancia**, a la **crítica política** y social. En fin, esmoliciones y deseyos pensando nun **mundu** y una **Asturies meyores**. Les lluches **ecoloxista**, **feminista**, **asturianista**, **solidaria**, **antiglobalizadora**... van ser les seños d'esti espaciu que les mios collacios y los mios collacios de **Mocedá d'Izquierda Asturiana** déxenme na internet. De momentu ehí va esta **primer tira** pa que podáis entamar a conoceme, pa que sepáis un poco más de la vida d'una **moza asturiana** que milita na **izquierda nacionalista y ecoloxista**. Salú. Puxa **Asturies Libre**. (eita.blogspirit.com)



Nel día d'Asturies

Mocedá d'Izquierda Asturiana asistió l'ochu de setiembre a tolos actos que se celebraron en Nava, siendo protagonista al par d'**IAS** y **Asturianistes**. La xornada entamó con una concentración a les afueres del pueblu, onde, xunto a una de les pancartes que dambos

partíos políticos tienen escolingaes pa protestar contra la llinia Soto-Penagos y la mala política enerxética y antiecolóxica que tamos careciendo, reivindicóse qu'**"Asturies merez otra cosa"**.



Al meudía, un restorán de la villa naveta foi l'escenariu nel que tolos asistentes participaron nuna **xinta de xermandía**, na que, nos postres, intervinieron **Ignaci Llope** por **IAS**, **Patricia Teja** por **Asturianistes**, y **Carlos F. Fuente**, como portavoz en funciones, por **mias>>**.



Los actos, a los qu'asistieron medios como TeleAsturias, Asturias.com, El Comercio y La Nueva España, allargáronse hasta bien entrada la nueche naveta, na qu'entá bien de militantes de les tres organizaciones siguen esparciendo **materiu reivindicativo**, tanto personalmente como dende'l **puestín** de **mias>>**, onde la **información** sobre'l nuesu proyectu tuvo a disposición de toes y toos, neto que la ropa y el restu de merchandising que **Mocedá d'Izquierda Asturiana** vien esparciendo dientro y fuera del nuesu país.



asturies >>

Énte los insultos d'Areces

Los glayíos de protesta siéntense bien alto dende **Mocedá d'Izquierda Asturiana**, énte les últimes declaraciones del presidente Vicente Álvarez Areces onde afita que *"la mocedá d'Asturies emigra porque la so cualificación ye meyor a les d'otres comunidaes autónomes"*.

Según el portavoz nacional de **Mocedá d'Izquierda Asturiana**, **Carlos Suari Rodrigue**, *"esti fechu constitúi, una vegada más, un insultu per parte del presidente asturianu, que tornó a desmentir l'éxodu de miles de moces y mozos asturianos y asturianos cada añu a la gueta d'un trabayu dignu"*.

Pa finar, **Carlos Suari Rodrigue** demandó *"una política seria d'emplegu onde s'igüe la problemática de la emigración de la mocedá asturiano, ún de tantos fechos sangrinos que tamos padeciendo con estos malgobnantes"*, polo que desixó *"menos insultos y mentires y más fechos y propuestas series"* pa rematar con un *"¡Yá ta bien d'agresiones, Sr. Areces!"*.



Televisión asturiana antiasturiana

Pal responsable de Nueves Tecnoloxíes y Comunicación de **mias>>**, **Xuacu Rodríguez**, *"esta televisión que debiere ser la de*

toles asturianas y asturianos **carez totalmente d'un modelu propiu pa ufrir programación afayadiza y de calidá a la mocedá asturiano**". Amás, aprovechó pa reiterar **"l'insultu a los habitantes d'esti País que constitúi la nula presencia de la llingua asturiana nunes emisiones que, en cualquier otru llugar del Estáu con llingua propia, emplegaríen ensin problema y como ferramienta de normalización social"**.

Asina, dende la formación de **mocedá nacionalista** pidióse **"la inminente dimisión"** del dirixente del énte radiotelevisivu asturiano, **Pérez Ornia**, pola **agresión "intolerable y constante de la TPA a tolo que tenga que ver cola nuesa llingua y cultura"**.

19.000 p'alló d'El Negrón



Dende **Mocedá d'Izquierda Asturiana (mias>>)** valórense negativamente los datos asoleyaos n'informe del observatoriu ocupacional del INEM tituláu **Mercáu de Trabayu de la mocedá. Asturias**. Acordies col informe, más del 70% de los contratos son temporales y dientro'l sector servicios, lo que pa Mocedá d'Izquierda Asturiana ye un exemplu de falta de dinamismu na economía asturiana y los problemes estructurales que carez el nuesu sonce mercáu llaboral, fechos venceyaos al apueste del PSOE y IU-BA por una economía especulativa, ensin rumbu, en cuenta d'una economía productiva que ye la que de verdá xenera valor añadiu y emplegu de calidá.

Énte estos datos, **mias>>** afirma que Vicente Álvarez Areces ye, como presidente d'Asturies, el principal responsable políticu de la emigración forciada de la mocedá asturiano énte la falta d'espectatives llaborales nesti

país. Amás, **mias>>**, la mocedá d'IAS, considera que la postura del presidente, que refuga la realidá de que carecen los miles de moces y mozos que se ven obligaos a emigrar, ye un insultu y una posición irrespetuosa dafechu pa colos qu'emigraron y pa toles asturianas y asturianos. Nesti sen, **mias>>** califica como un **"problema pergrave que precisa per parte de Vicente Álvarez Areces y los sos socios d'IU-BA que dexen la so indolencia y aparen de despreciar y amenorgar el fechu de que miles de moces y mozos asturianos tean obligaos a colar darréu d'unos polítiques fracasaes"**.

solidariedá >>

Pola paz pa Oriente Próxim

Mocedá d'Izquierda Asturiana al traviés de la plataforma **Uviéu pola Paz** na que trabaya activamente, participó y fixo un llamáu a la mocedá a participar na concentración que se celebró'l martes 25 de xunetu a les 20:00 hores énte'l Teatru Campoamor d'Uviéu. Ellí pidióse, al altu la lleva, la fin de l'agresión israelí contra Palestina y El Líbano, y **desixóse a los gobiernos asturiano y español la condena d'estos ataques**, asina como'l **cese de la venta d'armamentu** a Israel, que mata civiles con armes españoles.



Númeru dos del Soyáu Alternativu

Mocedá d'Izquierda Asturiana quier seguir apostando por xenerar una **llinia de discursu políticu** clara, capaz a llegar a les **moces** y los **mozos d'Asturies**, convidando a que **participen** activamente nesti proyectu alternativu.



mias>> enancha esti **Soyáu Alternativu** con un nuevu testu, qu'esta vez recueye la visión de la mocedá d'izquierda y solidaria sobre l'**internacionalismu**, y la **globalización**.

Dende'l sentir d'izquierdes, ecoloxista y asturianista que representa **mias>>** nun podemos dexar de llau, de nenguna manera, **el nuesu compromisu internacionalista de solidariedá, xusticia social, procuru col mediu ambiente y desendolcu sostenible**. D'esti mou, lloñe de tentar de crear nueves llendes coles nuses señes identitaries y culturales, y cola nuesa llucha por algamar l'autodetermín pa una Asturies soberana, quixéremos esparder y defender les reivindicaciones de toos y caún de los pueblos y cultures del planeta, amenazaos/es, cada vegada más, pol **fenómenu sangrinu de la globalización** qu'homoxeiniza too menos los derechos individuales y sociales, too menos la riqueza.

Campaña antifascista

Mocedá d'Izquierda Asturiana entama una **campaña contra'l fascismu** en toles sos vertientes n'Asturies, como respuesta al reciente aumentu d'esta lacra social. En primer llugar, una nueva colaboración con **Chobenalla Aragonésista** entitulada **Aragón y Asturies contra'l fascismu y el militarismu** na web conxunta www.arast.net sirve como puntu de partida pa la campaña col lema **"¿Vamos dexar qu'espoxyguen?"** que tamién va cuntar con materiales teóricos como una

nueva edición del documentu de llinia y reflexión política de mias>> *El Soyáu Alternativu*. Una guía de lugares fascistes d'Uviéu disponible en dellos formatos va ser otru de los materiales de **calter informativu** que podréis topar en breve na nuesa web **mias.as**.

La campaña naz con un doble envís: informativu y reivindicativu. Ye una campaña informativa porque va aportar datos y conclusiones alrodiu de la mayor presencia del fascismu, y ye una **campaña reivindicativa** porque va llamar a la **sensibilización** y la **reflexón social** como meyor manera de frenar la espansión de la presencia d'estes ideas escluyentes, racistes y, poro, antisociales.



Neonazis: Non más agresiones

Mocedá d'**izquierda Asturiana** quier amosar el so mayor **enfadu y refuga** énte una nueva agresión de la ultraderecha a dos compañeros menores d'edá, vinculaos a movimientos d'izquierda, en Xixón na nueche del otru 15 d'agostu, motivada únicamente por razones ideolóxicques.

Asinamesmo dende **mias>>**, énte la gravedá d'estos fechos que vienen careciendo munches compañeros y compañeros nos últimos tiempos, queremos reiterar el nuesu apueste, disponibilidad y **compromisu cola unidá dende la izquierda** pa facer un **frente común** qu'articule un movimientu

antifascista asturianu que dea respuesta a esta creciente problemática, nel que tean organizaciones polítiques, movimientos sociales y persones a nivel individual, nun momentu nel que precisamente, esta organización vien d'echar a andar precisamente una **campaña contra l'espardimientu de propaganda y les agresiones neonazis nel nuesu País**.

ecoloxía >>

Pola cultura forestal

Los diarios **El Comercio** y **La Voz de Avilés** vienen de publicar esti domingu 24 de setiembre un artículu d'opinión y análisis del **portavoz nacional de Mocedá d'izquierda Asturiana, Carlos Suari**. Nél, afóndase na necesidá de trabayar por xenerar un texíu de **vezos, respetu y educación respecto al monte**. Suari critica la **inutilidá d'unes polítiques de prevención d'incendios** que nun van más alló de la mesma urgencia que suel provocar la campaña estival nesti sen, si nun tienen una prolongación na busca de soluciones en ficies d'un **monte sostenible y públicu**, si nun se dan nun contestu xeneral d'educación social y de midíes más amplies que faigan por entamar una **verdadera cultura forestal**, pernecesaria pa una Asturias qu'anguaño firida -social y ecolóxicamente- de gravedá, tien cada vegada un pronósticu menos esperanzador.



qué ye mias? >>



Somos un grupu de **xente mozo** que facemos por esparder una **conciencia crítica** colo que nos arrodiada dende una **perspectiva asturiana y d'izquierda**. La **Ecoloxía, la Xusticia Social y l'Asturianismu** son les exes de la nuestra actividá. Actividá que tien de ser fecha por y pa la mocedá asturiano, amosando que n'Asturies somos munches/os les/os que nun tamos d'alcuerdu col modelu actual, que **nun vemos con bonos güeyos "l'autonomía" ruina y emprestada que nos "regala" l'estáu español, que nun asumimos como igua al nuestro futuru la emigración obligada, nin la explotación de los trabayos basura. Que nun llamamos frente a la discriminación sexista que les moxes tamos careciendo, nin a la implantación cuasi colonial de multinacionales, nin al esfarrape del nuestro mediu ambiente...** Trabayamos pa da-y al nuestro país otra traza. **Queremos una Asturias respetuosa col mediu, ensin xéneros, que s'enfrente a la globalización del beneficiu pa cuatro, pa mundializar los drechos sociales y llaborales. Una Asturias arguyosa de la so identidá, de la so cultura y llingua, una Asturias soberana, dueña del so futuru y qu'apueste pola democracia participativa con una ciudadanía protagonista de les decisiones que-y afecten. Una Asturias llibre, onde la opción sexual nun seya torga pal desenvolvimientu social. Queremos ser la mocedá que faiga por otra Asturias, la de la xusticia y la llibertá. Ente toes y toos vamos construyir la nuesa Asturias.**

Mocedá d'izquierda Asturiana

www.mias.as >> mias@ias.as
Primo de Rivera, 1, Oficina 9. 33001 Uviéu.

